

Un bon candela; Un desaster; y ayo tur documento Historico di Aruba

EDIFICIO NOBO PA ARCHIVO HISTORICO

Pa di dos biaha advertencia a ser duna na nos gobernantenan cu a bira tempo pa kita "Archivo Historico" di unda e ta (den edificio bieuw di teatro Rialto) y construi un edificio apart y special pa nos archivonan historico.

Algun tempo pasa un candela a tuma lugar den un apartamento pega cu e edificio, y ta danki na un empleado di Archivo, kende a bula subi via muraya di e edificio den cual tabata tin candela, cu a logra scapa e edificio di Archivo Historico di e candela cu lo a expande.

E siman aki den e mes vecindario, casi pega cu Archivo Historico, atrobe tabata tin un candela, y un biaha mas e edificio a scapa cu e candela no tabata mas grandi y expande.

KICO DI BALOR TIN EYDEN ANTO

Den Archivo Historico tin mas di 5000 caha yena cu documentonan historico di centenares di aña bieuw cu historianan cu ta "diamantenan" di nos historia.

Si un candela destrui e edificio aki, nos por wel di bisa: "ayo historia di Aruba !!".

Nos documentonan pa varios aña caba den e edificio aki ta deteriorando.

Nan ta documentonan cu mester wordo cuida cu cierto temperaturanan, cierto tratamiento di papelnan, documentonan cu mester keda leeuw di insectonan, documentonan cu mester wordo trata como sifuera ta "un baby recién naci" cada papel ta.

Nos Archivo Historico ta un joya di informacion, y mester menciona acerca cu esaki ta e instancia gubernamental cu ta "di mas servicial" cu tin riba e isla aki.

Masha "klanten vriendelijk" manera un persona a yega di expresa na mi persona.

Mi sa di esaki tambe pasobra pa basta tempo, casi tur mainta mi ta eyden un pa dos ora y ta mira e movecionnan cu tin y e trato cu tur bishitante ta ricibi.

Esaki ta un instancia caminda cada un di e empleadonan ta traha cu "entusiasmo" y cu "Amor pa nan trabao" pero por nota tambe e frustracion di no por ta den un edificio adecuado pa preservacion di nos documentonan historico.

Empleadonan cu "ta stima papel bieuw, pero di gran balor".

E frustracion ta e condicion bao di cual nan ta traha den e edificio aki caminda awacero ta drenta via scheurman den muraya, forma plasnan, trece cierto humedad cu ta dañino pa e documentonan.

Insectonan cu ta ser haya pafo y paden di e edificio y cu ta come papelnan despues di tempo di awacero y ora cu no percura pa "fliet" rond di edificio.

Tin documentonan cu mester di cierto tratamiento pa nan conservacion ademas.

Cada pida papel den e Archivo Historico, ta "bolo di pistacho, bolo chateau y bolo di fruta" pa insectonan comedor di papel.

Ta yega un dia cu e vloer di palo cu ta kraak cu cada pasada tambe lo basha abao riba e archivonan stiwa den piso abao.

Aruba mester di un edificio moderno pa su Archivo Historico.

Un edificio para riba su mes, y por lo menos 100 meter leeuw di otro edificionan rond di dje.

No manera esun actual den ex teatro Rialto, cu ta rondona pa edificionan den cual ta yen di apartamento den forma di hokki hokki, cu bomnan di gas paden.

Un edificio pega cu otro edificionan cu un dia pa otro ta basha den otro, of cu takeaway of restaurant lo por causa un candela desastroso (pasobra ta henter e cuadro of mas lo bay si no ta mitar di centro comercial)

Un edificio caminda cu bo no sa mas con conexionnan di coriente ta core den edificionan rond di esaki y si e circuitonan di coriente ta bon of no.

No mester tarda mucho na aproba placa y cuminsa construi e Archivo Historico na un lugar mas "safe". pa nos documentonan di algun siglo y portretnan di ultimo 100 pa 150 aña di nos Aruba di e tempo ey.

Esaki ta entre e prioridatnan pa gobierno tene cuenta cune, no warda pa e gai corra canta pa di tres biaha.

HOLOSHI NO TA CONTA MAS

Pa actividadnan riba nos isla, parce cu holoshi no ta conta mas. Mientras cu nan por "coi hende haci..." manera ta ser bisa, no mester percura cu ora.

Si ta 8 or, actividad no ta cuminsa 8 or mas tampoco. Pa mas tempran por ta 9 or.

Cas di Cultura mes cu tabata un di e lugarnan unda 8 or ta 8 or of 8.30 or ta 8.30 or, por a nota cu esnan cu ta organiza eynan no ta tene cuenta cu esaki tampoco y ultimamente e oranan a cuminsa varia.

Dia di e prome anochi di Vale cu Pachi mes, ta publico a cuminsa klap man 8.45 y klap atrobe 8.55 or pa e show por a cuminsa.

Tabata tin un show infantil cu tampoco tabata riba ora stipula.

Dialuna ultimo riba plaza Betico, un actividad di Venezolanonan, a cuminsa te despues di 9or, ya cu na momento di cuminsa tabata prepara sonido. Ora el a cuminsa mes no tabata tin ni 50 persona presente.

A bira tempo pa cuminsa riba e ora stipula.

Si bisa 8 or banda ta cuminsa toca, no kiermeen cu 8 or banda ta cuminsa instala pa cuminsa 9 or, manera e malesa arubiano "tempitis" ta. Si ta un persona tin 8 or, ta cuminsa 8 or. El a paga pa e show of actividad cu ta cuminsa 8 or y no pa un ora despues.

Reunionnan di Staten tin e mes malesa. President ta suspende reunion "pa 5 minuut" y un cuarto di ora pa mey ora despues ta cuminsa.

Ayera mainta 11.30 or a schors reunion pa 15 minuut, y 1.30 or bo ta caba cu bo lunch y ainda e suspension di 15 minuut no a termina.

Esaki tambe ta parti di e bon ehemplonan cu ta ser duna.

Juby

E repetición di grabacion radial durante Staten

Ayera durante dia, mi telefon por poco a smelt di yamadanan cu a referi na e grabacionnan cu ta ser toca na Radio 1270 durante reunion di Staten y cu ta irita e oyentenan debi na nan repeticion.

Hopi di e oyentenan a duna di conoce cu nan a stop di scucha reunion di Staten djies pa motibo di esaki.

No cu nan ta contra e agrupacionnan y artistanan, pero cu ta varios aña caba ta a mes grabacionnan ta ser toca dia aden dia afo y si reunion sigui anochi te madrugada, ta e mes cancionnan ta keda bin back como sifuera ta riba un circulo sin fin nan ta core.

Aki sin embargo, no por culpa e emisora pasobra tin un historia tras di esaki.

E historia ta cu mas o menos 35 aña pasa cu Bestuurscollege (di PPA) a firma contrato cu Radio Antillana (e tempo ey, maneha pa Sr. Juan Bautista Wix [q.e.p.d.] y Sr. Tuyo Prince [q.e.p.d.] como director) un di e stipulacionnan tabata menciona cu mester a toca cancionnan instrumental prome cu reunion y durante interrupcionnan y mas bien cancionnan di nos folklore.

E emisora e tempo ey tabata tin coleccionnan grandi di disco, principalmente di Padu del Caribe y di compositornan y musiconan di Corsow, pasobra nos artistanan local no tabata graba e temponan ey manera

cos ta awendia.

E emisora te awe ta cumpliendo cu e contrato aki (di cual mi ta sigur cu ni e parlamentarionan, ni ministronan di awe, no sa cu ta existi, corda pa e griffier awe por haya e copia di esaki)

Tempo a cambia y por haci cambio den esaki.

Por mantene nos cancionnan instrumental, y trece cancionnan segun e temporada aden, pero ta contrato mester cambia pa e emisora por cumpli cu su oyentenan y cu gobierno.

Otro asunto cu a hunga un rol tambe ta cu e emisora aki tabata tin hopi "ups and downs" den su prome 15 añanan y hopi disco di artistanan local a bay perdi tambe, haciendo asina cu nan repertorio a baha considerablemente.

E emisora aki tabata tin den su prome añanan un di e mihor coleccionnan di musica di nos folklore, local a somenta.

Lo ta bon pa e gerencia dinamico di awe, di Radio 1270 sinta cu ministro encarga y formula stipulacionnan nobo encuanto e tipo di cancionnan cu mester wordo toca y cu lo por mantene interes di oyentenan durante reunionnan di Staten.

Juby